

## Script of Evening Gojri News Bulletin 05 October 2024 at 1700 Hrs

ایوننگ گو جری نیوز بلیٹن مو رخہ 05 اکتوبر 2024

\*\*\*\*\*

یوہ آکا شوانی جمونہے عبدالرحمن تے طارق ابرار تیں خبر سنو۔ پہلاں خاص خاص خبر۔  
\*\*\*\*\*

- \*1. سلامتی دستاں نے ضلع کپواڑہ مانہہ دراندازی غی اک کوشش ناکام بناتاں واں 2 دہشت گرداں نانہہ ہلاک کر دتو ہے۔
- \*2. وزیر خارجہ ایس جے شنکر نے کہیو ہے جے شہنگائی تعاون تنظیم اجلاس غے دوران بھارت پاکستان سنگ تعلقات بارے گل بات نہیں کرے گو۔
- \*3. جموں کشمیر یوٹی پیہر غا رائے دہندگان نے جموں کشمیر مانہہ پُر امن تے صاف و شفاف اسمبلی چناؤ کران واسطے بھارتی چناؤ کمیشن غو شکریو ادا کیو ہے۔
- \*4. تے بھارت فورکس ریزرو مانہہ 700 بلین ڈالر تیں تجاوز کرن آلو چوتھو ملک بن گیو ہے۔  
\*\*\*\*\*

خبران غی تفصیل نال پہلا عبدالرحمن۔

### Infiltration Bid

شمالی کشمیر غا ضلع کپواڑہ مانہہ حفاظتی دستاں غی طرفوں دراندازی غی اک کوشش نانہہ ناکام بناتاں واں 2 دہشت گرد مار گرایا گیا ہیں۔ اک سماجی ذرائع ابلاغ پوسٹ مانہہ فوج غی چنار کمانڈ سرینگر غی طرفوں دسیو گیو ہے جے کنٹرول لائن وروں دراندازی غی اک کوشش بارے خفیہ اطلاع ملن توں بعد کل ضلع کپواڑہ غا گوگل دھار علاقہ مانہہ بھارتیہ فوج تے جموں کشمیر پولیس غی طرفوں اک سانجھو آپریشن چلايو گیو۔ جس دوران چکنا فوجی دستاں نانہہ اس علاقہ مانہہ گجھ مشکوک حرکتاں بارے پتو چلیو۔ جس تیں بعد دہشت گرداں سنگ حفاظتی دستاں غی دو طرفہ فائرنگ شروع ہو گئی۔ دفاعی عہدیداراں غو کہنو ہے جے فوجی دستاں نے موثر جوابی فائرنگ کرتاں واں 2 دہشت گرداں نانہہ مار گرایو۔ آپریشن غے دوران حفاظتی دستاں غی طرفوں اتوں جنگ جیسو ذخیروی برآمد کیو گیو ہے۔ آخری خبر ملن توڑی اُس علاقہ مانہہ تلاشی آپریشن جاری تھو تے مزید تفصیلات غو اجوں انتظار ہے۔  
\*\*\*\*\*

### External Affairs Minister

مرکزی وزیر خارجہ ڈاکٹر ایس جے شنکر نے کہیو ہے جے اسلام آباد پاکستان مانہہ 15 تے 16 اکتوبر نانہہ منعقد ہو رہی شہنگائی تعاون تنظیم یعنی ایس سی او سربراہ کا نفرنس غے دوران بھارت اپنا تعلقات بارے پاکستان سنگ کوئی وی تبادلہ خیال نہیں کرے گو۔ اج نوی دہلی مانہہ انتظامیہ بارے آئی سی مرکز غی طرفوں منعقدہ انتظامیہ بارے سردار پٹیل لیکچر مانہہ شرکت غے دوران وے ذرائع ابلاغ سنگ بات چیت کر رہیا تھا۔ ڈاکٹر جے شنکر نے کہیو ہے اس ایس سی او سربراہ کا نفرنس مانہہ اُن غی شرکت غو مقصد اس تقریب مانہہ کثیر الجہتی رویہ ورتو جو دینو ہے۔ ڈاکٹر جے شنکر نے اس گل وروی اشارو کیو ہے سارک سربراہ کا نفرنس وی ترقی در آگے نہیں بدھ رہی ہے۔ کیونجے حالیہ بہراں مانہہ اس غی کوئی میٹنگ منعقد نہیں ہوئیں۔  
\*\*\*\*\*

## Doda Voter

ضلع ڈوڈہ غا رائے دہندگان نے دس سال غا وقفہ تیں بعد جموں کشمیر مانہہ پُر امن تے شفاف چناؤ کران واسطے بھارتی چناؤ کمیشن غو شکرپوادا کیو ہے۔ آکاشوانی سنگ گل کرتاں واں رائے دہندگان نے صاف تے شفاف چناؤ کران واسطے دتی گئی سہولتاں غی تعریف کی۔ اس بارے گل کرتاں واں اک رائے دہندگان نے اس طرح کہیو۔ بانٹ۔۔

\*\*\*\*\*

## Training Poonch

اسمبلی چناؤ 2024 غی گنتری غا سلسلہ مانہہ ملازماں غی ذمہ داریاں بارے 3 تہاڑاں غو تربیتی اجلاس اجلاس اچ پونچھ مانہہ کامیابی سنگ اختتام پزیر ہو گیو ہے۔ تربیت بارے ضلع نوڈل افسر پروفیسر فتح محمد عباسی غے مطابق اس تربیتی اجلاس مانہہ 219 ملازماں نانہہ تربیت دتی گئی۔ تربیت دین گو مقصد چناؤ غی گنتری غے دوران ووٹ شماری غا طریقہ کاراں غی عمل آوری یقینی بنانو ہے۔ تربیتی اجلاس غے دوران ملازماں نانہہ ووٹ شماری گا بکھ بکھ پہلواں تیں واقف کرایو گیو جن مانہہ الیکٹرانیک ووٹنگ مشیناں غو رکھ رکھاؤ، نتائج غو چنگا طریقہ سنگ معاینو کرنو اور چناؤ کمیشن غا رہنما خطوط غی عمل آوری یقینی بنانو شامل ہے۔ تربیت غا اختتامی اجلاس غا موقعہ و ر پر و فیسر فتح محمد عباسی نے ملازماں غی تیاری بارے بھروسو ظاہر کرتاں واں اس طرح کہیو۔ بانٹ۔۔

\*\*\*\*\*

## AIIMS Jammu

طبی سائنس بارے گل بند ادارہ یعنی ایمز جموں غی طرفوں اک سنگ میل تہہ کرتاں واں چہرہ تے جبڑہ غے متعلق کامیاب سرجری کی گئی ہے۔ یاه سرجری ایمز جموں غا سی ای او و ایگزیکٹو ڈائریکٹر پروفیسر ڈاکٹر شکتی کمار گپتا غی لیڈر شپ غے تحت سر انجام دتی گئی ہے۔ تے یاه کامیابی ایمز جموں واسطے اک نواں باب غی شروعات ہے۔ ایمز غا سرجری محکمہ غو مقصد جوڑاں غا درد گا علاج سمیت جدید طبی خدمات نانہہ مزید بدھانو ہے۔ تے یوہ ادارو ہن جموں کشمیر، پنجاب، لمبہ لداخ تے ہماچل پر دیش گا مریضان نانہہ طبی سہولیات دستیاب کراوے گو۔ اس موقعہ و ر امنجوت کور نے اس محکمہ گا کم ور تسلی ظاہر کرتاں واں کہیو جے ان خدمات سنگ مریض بہتر تاثرات دے رہیا ہیں۔

\*\*\*\*\*

## BSF Recuritment

اپنی شاندار روانیت نانہہ جا ری رکھتاں واں بارڈر سکیورٹی فورس نے ایس ٹی سی، بی ایس ایف اڈھم پور مانہہ نواں پہرتی ہوا جواناں غی تربیت غا اختتام غا سلسلہ مانہہ تصدیق تے پاسینگ آؤٹ پریڈ غو اہتمام کیو۔ تربیت حاصل کرن آلا 624 جواناں گو تعلق آندھرا پر دیش، اڑیسہ تے مغربی بنگال ریاستاں سنگ ہے۔ ان جواناں نے 44 ہفتاں غی تربیت حاصل کرن تیں بعد ملک غی خدمت غو حلف چایو۔ اور ہن انہاں نانہہ متعلقہ جگہاں ور ڈیوٹی واسطے روانہ کر دتو جا ئے گو۔ پاسنگ آؤٹ پریڈ تقریب مانہہ انسپکٹر جنرل ایس ٹی سی، بی ایس ایف اڈھم پور راجیش کمار گو رنگ مہمان خصوصی تھا۔ جنہاں نے پریڈ غی سلامی لی۔ راجیش کمار نے تربیت دین آلا افسراں گا کم غی تعریف کی۔ اس موقعہ ور گل کرتاں واں تربیت حاصل کرن آلا بی ایس ایف جوان نے اس طرح کہیو۔ بانٹ۔۔

\*\*\*\*\*

یہ خبر تم آکاشوانی جموں تیں سن رہیا ہیں خبراں غا باقی حصہ نال طارق ابرار۔

## India Foriegn

بھارت 7 سو بلین امریکی ڈالر گا غیر ملکیڈر مبادلہ نانہہ پا ر کرتاں واں دُنیا مانہہ چوتھی بڑی اقتصادیات بن گیو ہے۔ تے اس طرح چین جاپان تے سویزرلینڈ سنگ جا ملیو ہے۔  
واضع رہ جے 27 ستمبر نانہہ ختم ہوا ہفتہ مانہہ بھارت غا غیر ملکی ڈر مبادلہ غا ذخائر مانہہ 12 عشاریہ 588 بلین امریکی ڈالر غا بابدہ سنگ اج تک غی سب تیں بڑی بلندی یعنی 7 سو 4 عشاریہ 885 بلین امریکی ڈالرز تک پُج گیا ہیں۔ اس تیں پہلاں غا 20 ستمبر نانہہ اختتام پزیر ہوا ہفتہ مانہہ غیر ملکی ڈر مبادلہ منتقلی مانہہ 2 عشاریہ 8 بلین ڈالر غا اُوچھال سنگ یہ ذخائر 692 عشاریہ 3 ڈالرز رہیا۔ تیزی سنگ بدھیا اس ڈر مبادلہ سنگ بھارت عالمی اقتصادی غیر یقینی صورتحال سنگ نمڑن غے قابل ہون غے نال نال غیر مستحکم بین القوامی منڈی مانہہ اپنی کرنسی نانہہ مضبوطی پانیداری مہیا کروائی ہے۔  
بھارتیہ ریزرو بینک غی طرفوں جا ری حالیہ خاکہ غے مطابق بھارت غا سونا غا ذخائر 2 عشاریہ 184 بلین تیں بدھ غے 65 عشاریہ 796 بلین ڈالر ہو گیا ہیں۔ تے اسے طرح بین القوامی مو نیٹری فنڈ سنگ عالمی مالیاتی فنڈز تیں زائد ڈر مبادلہ خریدن غا خصوصی اختیارات 8 بلین تیں بدھ غے 18 عشاریہ 547 بلین امریکی ڈالر ہو گیا ہیں۔

\*\*\*\*\*

## PM Khadi India

وزیر اعظم نریندر مو دی نے اج کھادی غا فروخت با رے نواں ریکارڈ نانہہ سراپتاں واں کہیو ہے جے یاہ حوصلہ افزاء حصولیابی ہے۔ اک سماجی ذرائع ابلاغ پوسٹ مانہہ اُنہاں نے کہیو ہے جے مہارہ مُلک غا لوکاں مانہہ سوادیشی غو رُجحان تیزی سنگ بدھ رہیو ہے۔  
واضع رہ جے گاندھی جینتی غا موقعہ ور کھادی بھون نوی دہلی مانہہ صرف اک ہی روز 2 کروڑ 1 لکھ 37 ہزار روپیاں غی ریکارڈ کھادی اشیاء غی فروخت ہوئی ہے۔

\*\*\*\*\*

## Protest Doda

ڈوڈہ ضلع مانہہ اج سرسوتی نار سنگھ نند غے خلاف زبردست احتجاج کیو گیو۔ جس نے پیغمبر اسلام حضرت محمد ﷺ غے خلاف گستاخانہ زبان استعمال کی ہے۔ مہارا نمانندہ نے دسیو ہے جے تمام بڑا تے چھوٹا قسباں مانہہ مقامی لوکاں نے احتجاج کرتاں واں اس شخص غے خلاف سخت کا روائی اپنان غی مانگ کی ہے۔ ڈوڈہ قصبہ مانہہ جامع مسجد غے نیڑے لوکاں غی بڑی تعداد جمع ہوئی۔ جنہاں نے فر جلوس کڈھ غے ایسی گستاخی غی مزمت کی ہے۔ اس جلوس غی سربراہی نیشنل کا نفرنس غا لیڈر خالد نجیب سہر وردی سمیت کئی معزز سیا سی شخصیات وی کر رہی تھیں۔ اسے طرح غا احتجاجی جلوس بھدرواہ، بہالا، ٹھاٹھری، گندھو تے بھلیسہ مانہہ وی کڈیا گیا تے نار سنگھ نند غے خلاف کاروائی غی مانگ کی۔

\*\*\*\*\*

## Kathua Sports

محکمہ یوتھ سروسز اینڈ سپورٹس کٹھوعہ غی طرفوں سپورٹس اسٹیڈیم کٹھوعہ مانہہ بین ڈویژن یوٹی سطح غا کھوہ کھوہ لڑکیاں غا ٹورنامنٹ غو اہتمام کیو۔ جہیڑو 5 اکتوبر نانہہ شروع ہو غے 10 اکتوبر 2024 توڑی جا ری رہ گو۔ اس ٹورنامنٹ مانہہ جموں تے کشمیر ڈویژن غی 14, 17, تے 19 سال تیں کھٹ عمر غی گذریں حصولے رہی ہیں۔ اج جموں اور کشمیر ڈویژن غی 14 سال تیں کھٹ زمرہ غی گذریاں غے بشکار میچ کھیڈیو گیو۔ اس موقعہ ور گل کرتاں واں ضلع کھیڈ افسر سنیل سنگھ نے اس طرح کہیو۔۔ بانٹ۔۔

\*\*\*\*\*

## MLA Nomination

اک دہائی تیں بعد جموں کشمیر مانہہ وجود مانہہ آن آلی حکومت غی تشکیل مانہہ نامزد ہون  
آلا 5 ممبران قانون ساز اسمبلی پہلی وار اہم رول ادا کریں گا۔ آکاشوانی غا نمائندہ غی  
رپورٹ غے مطابق یہ ممبران اسمبلی کشمیری مائیگریٹنٹان، پاکستان غا قبضہ آلا جموں  
کشمیر تیں آیا مہاجراں غی نمائندگی غا اک چُنیا وا ممبر اسمبلی غی طرح مکمل اختیارات  
غے نال کریں گا۔ ان طبقاں غی نمائندگی غا سلسلہ مانہہ یوہ اہم سنگِ میل ہے اور اسمبلی  
مانہہ ان لوکاں نانہہ نمائندگی غی مانگ وی کا فی پُرانی ہے۔ نواں انتظامات غے تحت  
جموں کشمیر غی قانون ساز اسمبلی غا ممبران غی تعداد مانہہ تو سب سے کر غے 95 کر دتی  
گئی ہے۔ اور حکومت بنان واسطے 48 ممبران غے اکثریت ثابت کرنی وے گی۔ لیفٹنٹ گورنر  
وزیر داخلہ غی مشاورت نال ان 5 ممبران نانہہ نامزد کریں گا۔ جموں کشمیر مانہہ یوہ  
طریقہ کار ر جموں کشمیر تشکیل نو قانون 2019 مانہہ ترمیم غے مطابق عملایو جا ئے گو۔  
واضعرہ جے 26 جولائی 2023 نانہہ اس قانون مانہہ اک ترمیم کر غے ممبران غی  
نامزدگی غو طریقو کار متعارف کرایو گیو تھو۔ کانگریس نے بی جے پی قیادت آلی  
حکومت غا اس عمل ورا اعتراض جتایو ہے۔ جس مانہہ لیفٹنٹ گورنر غی طرفوں 5 ممبران  
غی نامزدگی عمل مانہہ آن غے جموں کشمیر مانہہ نویں حکومت تشکیل دتی جا ئے گی۔

\*\*\*\*\*

اس غے نال بی خیراں غو یوہ بلیٹن ختم ہوؤ۔